



Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 7

Yangia anidakangma :



Tir Yimym



tiryimym@aolima



tir yimym

TAPAK 8

**Iran Tir Raisi-i April 22 nü
Pakistan semdangsi**

**Stefanos Tsitsipas-i Monte
Carlo Masters kokogo**



VOL. XXI ISSUE NO. 183 (ADOK 183) DIMAPUR SANGTENNÜ (TUESDAY) RONGCHII (APRIL) 16, 2024 ₹ 5.00

Naga nungeri state aser Centre sorkartem dang jashir; Takok ngura Supongmeren nem cabinet menden agütsütsü

Kohima, April 15, 2024 (TYO): Naga nungeri state sorkar dang melendar aser Centre nung sorkar melendaksünür ta All India Congress Committee (AICC) lennir Girish Chodankar-i ashi.

National alliance party-i linük nung rejutem dak tim masüba inyakba atema nübertemi NDPP-BJP teloktep sorkar dang melendar ta Nagaland, Manipur, Sikkim aser Tripura AICC in-charge Chodankar-i ashi.

Congress Bhavan nung osangbener den jembidang "Centre sorkar inyaksangshiba atema nisungtem kanga jashir" ta pai ashi.

Taküm Lok Sabha elections ya India tarutsü atema lir aser Constitution kümzüka ayutsü atema lir" ta Chodankar-isa ashi.

"Taruba elections ajanga linük tarutsü tia lemtetsü aser linük nung nübertem tangatetba melenshir aser 'ache din' dak

tamang makar. Narendra Modi-i taila tenangzüka aser guaranteees dak mamanger" ta paisa ashi.

Nagaland nung alirtemi INDI Alliance nem vote enoktsütsü amanger, ta Chodankar-isa shisem.

"Centre nung INDI Alliance-i sorkar akümtsü aser Nagaland-i Congress candidate S Supongmeren Jamir shimer yoktsü. Centre nung Congress-i aniba sorkar nung Supongmeren nem cabinet menden agütsütsü" ta Chodankar-isa ashi.

Nagaland Pradesh Congress Committee (NPCC) president ka ama Supongmeren-i Rahul Gandhi lenisüba kübok Bharat Jodo Yatra takok ngua agiogo. Supongmeren ya Rahul den tesentaktep tajung lir aser pa nem cabinet menden agütsür pai Nagaland aser North East region atema inyaksü ta paisa metetdaksü.

"Nagaland nung Congress-i

takok angutsü amanger saka booth capturing ajurutsü akok. Nagaland sorkari par candidate tamakok angutsü osang angashiba sülen jashir. Deputy Chief Minister Y Patton-i GBS dang yimtsüng ajunga tenüng nung PDA candidate Dr Chumben Murry nem vote enoktsütsü mepishio" ta Chodankar-isa ashi.

Nagaland sorkari takok angutsü atema Assembly Constituency 60 nungi 12 nung booth capturing asütsü sentong renema aliba osang angazükogo. Iba atema Nagaland State Congress-i Chief Electoral Officer Nagaland dangi shidi ka zülüogo aser iba nung Assembly Constituency 12- Dimapur I, II & III, Ghaspani I & II, Kohima Town, Northern Angami II, Phek, Meluri, Tyui, Wokha Town aser Jangpetkong tenüngtem agütsüogo ta pai ashi.

"Onoki free & fair elections

agitsü nenshir aser identity card tejangia malir ka danga polling booths-i marudaktsütsüla" ta Chodankar-isa ashi.

April 16, 2024 nü Dimapur nung Congress Election Campaign sentong tulu ka agitsü aser idangji AICC president Mallikarjun Kharge-i o jembitsü ta paisa ashi.

"Nagaland nung shirnokisa Delhi nung temelenshi bener arunür nenok ajak iba campaign nung shilem agitsü aser Congress candidate nem vote enoktsütsü mepishir" ta paisa ashi.

"BJP national president JP Nadda-i NDPP candidate nem election campaign ayonga agiba ajanga NDPP-i BJP den külemi inyaksangshiba kuli agütsür. Anungji Nagaland nung nübertemi linük nung nübo agi tangar memenepertem amakba telok ka yaritsü asü masü lemtet agitsüla" ta Chodankar-isa metetdaksü.

Prime Minister Modi-i tzüküm aser tzüyimtem sema senzür aser photographers nem noksa agidaktsür. Pai bendang linüktem sema senzür saka Manipur semdangtsü asoshibo mapang mali, ta pai ashi.

Linük nung minorities aser secular voters-i ibala inyakyim magizüker ta Nagaland aser North East nung alirtemi ola yoktsü amanger, ta Chodankar-isa ashi.

Iba sentong nung Nagaland Pradesh Congress Committee working president Khriedi Theünoo-ia Nagaland nung NGOs, arogo lennirtem aser civil societies-i Mongulbarnü public rally agiba sülen AICC president Kharge den ajuruteptsü mepishia metetdaksü.

April 16, 2024 nü public rally ji Super Market complex Dimapur nung anügdang 12:00 ako nung alitsü ta Khriedi Theünoo-isa ashi.

Modi-i aniba BJP sorkar mapang NE nung yimjung aruogo: Amit Shah

Agartala, April 15, 2024 (Agencies): Narendra Modi-i aniba National Democratic Alliance (NDA) sorkari küm 10 tsüingda Northeast nung yimjung bener aruogo, peace accords 10 tema nung sign sütepego aser telungpur 10,000 tema temai adokogo ta Union home minister Amit Shah-i ashi.

Tripura kübok Kumarghat nung election rally ka nung jembidang Amit Shah-i Centre sorkar indang tribal development budget medemdanga jembidi. "Congress sorkar mapang Rs 24,000 crore liasü saka Narendra Modi-i aniba Bharatiya Janata Party (BJP) sorkari Rs 1.25 lakh crore tutsüogo" ta pai ashi.

Mezüngbuba lisopur tetsür Droupadi Murmu President inyaksü shim aser Eklavya Model Residential schools 740 lapok ta Shah-i ashi.

Tripura nung Reang nunger 40,000 tashi lidaktsüogo aser national highways o railway lines ulushiba dak alia terenlok mapatong aika inyakogo ta paisa ashi.

Paisa Tripura East Lok Sabha nung BJP candidate Kriti Devi Debbarman nem vote enoktsütsü ayongzüker.

Bharatiya Janata Party (BJP)-i Manipur nung Inner Line Permit (ILP) mapa agütsü ta Amit Shah-i Hombarnü ashi.

pai PM Modi dang Manipur nung inner-line permit medeni longjema melitetsü ta pai ashi" ta Shah-i tanü ashi.

"BJP-i aniba Centre sorkari Manipur nung yimjung bener arutsü atema inyaker. Taruba Lok Sabha election ya Manipur loksaa odaktsütsü tashitem aser longjema yunürtem tsüingda tetoktepba ka lir" ta pai ashi.

"Manipur nung kin ajak dener yimjung bener arutsü aser Narendra Modi'er sorkari state melemsatsü asoshi temulung agütsür" ta Shah-isa ashi.

"Modi'er sorkari lemtet balala ajanga ochimashi anendaktsüogo aser tashishitsü melii sorkari ketdangsuba mapa inyaker" ta Amit Shah-isa ashi.

Modi'er sorkari tesüiba küm 10 inyaka arudang tongtipang mapa inyakbatem rongnung Myanmar den Free Movement Regime (FMR) agienba lir. Manipur litsü kümzüka ayutsü atema FMR agienba ya tongtipang mera ka lir, ta Shah-i metetdaksü.

"Manipur state melenshitsu tasa atonga inyakba noktangtsü atema Modi'er sorkari Free Movement Regime anen. Komar ka merang yonga onoki nisung shinga nem-a Manipur state melemsadaktsütsü" ta pai ashi.

Amit Shah-isa nübertem dang Inner Manipur aser Outer Manipur Lok Sabha constituency tem nung BJP candidates nem vote enoktsütsü mepishi.

April 17 nü Nagaland nung nüboyimba anentsü

Kohima, April 15, 2024 (DIPR): Nagaland Parliamentary Constituency atema nüboyimba maparen April 17, 2024 nikongdang 4:00 ako nung tembangtsü ta Chief Electoral Officer Nagaland Vyasan. R IAS-i ashi.

April 17, 2024 nikongdang 4:00 ako süir election dak sendakba sentong, public senden mesüra yimdong süa jajaba sentong kecha mayongzüktü aser madentsü. Iba mapang süir cinematograph, television mesüra tanga similar apparatus ajanga election dak sendakba osang kecha melemsateptsü ta

CEO Nagaland-i ashi.

Iba anogo sülen musical concert mesüra theatrical performance mesüra entertainment mesüra amusement amala sentong ajanga election nüboyimba mapa meinyaktsü ta paisa ashi.

Item tetuyuba sülen manidakertem mapang telatet ka atema mesüra küm 2 tashi tepuokdak ayutsü akok. Iba mapang sülen constituency nung nüboyimba sentong kecha magitsü aser tangalen nungi arur ajak constituency toktsür aotsüla ta CEO Nagaland-isa nenshiogo.

District Election Administration/ Police Administration-i April 17, 2024 nikongdang 4:00 ako sülen political lennir ajak constituency toktsür aotsü atema mapa inyaktsü.

Ajisüaka, iba tenokdangba kübok political parties nungi Nagaland state in-charge tem madentsü. Iba ama ketdangpurtemi State Headquarters nung pa/la aliba osang aser pa senzüba ashitsüla aser par/lar party office aser pa/la anenzükdkak tsüingda dang senzusenbongtsü ta CEO Nagaland-isa metetdaksüogo.

FNR-i Naga National Anthem adopt süogo



Dimapur, April 15, 2024 (TYO): Forum for Naga Reconciliation (FNR)-i Naga National Anthem adopt asüba osang metetdaksüogo. Taküm March 6 aser April 13 anogotem sendentem amenba sülen taoba Indian Administrative Service (IAS) ketdangsur R Kevichusa-i mejemba ken agizük.

Naga political groups (NPGs), shisaliok rejutem, Naga civil bodies aser sendaka aliba telok ajaki Naga National Anthem atentsü bangzüng ka renemogo. February 16 nungi 18 tashi Kutsapo, Nagaland nung "Nurturing Naga Peoplehood: Liberating the Naga Spirit" alidang Naga yimten teloktem, arogotem,

civil society organizations, prayer centres aser Naga lima ajungalen nungi nisungtem adenshir Naga nunger tarutsü atema alizüng ayu ta FNR-i tanü sangdong ka nung ashi.

Iba sülen Kohima nung March 2, Dimapur nung March 6 aser April 13 nü Dimapur nung tatemsaba senden amendang iba mangdang akangshio" ta FNR-isa ashi.

Senden balala mena arubaji külem teimla asoshi sabangtem ama liasü aser Naga nunger pei sasa ketdangsuba aliba tangatetba ajanga tangar ketdangsubaren dak mekongshir ta asüba bangjemshio" ta FNR-isa metetdaksü.

April 13 nü NPGs aser FNR tsüingda senden amendang May 16 ya Naga Plebiscite Day ama züngshir aser iba nüngtem nung FNR-i NPGs aser tanga Naga teloktem den külemi Dimapur nung sentong balaka ayongzüka agitsü lemtet.

September 14, 2022 nü "September Joint Accordant" aser June 13, 2009 nü "Covenant of Reconciliation" nung sign sütepeba FNR aser NPGs senden nung akangshitepogo ta parnoki ashi.

Nagaland nung alir ajaki, kin mesüra tamangba yimsü balala süaka taitok agütsüteptsü aser tarutsü asoshi külem mangdang nung noktaksü ayongzüker ta FNR-isa metetdaksü.

Nagaland Angh-i Medziphema nung Kirtan Bhawan semzüksü



Dimapur, Metsüremi/March 15 (TYO): Nagaland Angh La Ganesan-i April 15, 2024 nü Shree Shree Vindhya Basini Mandir, Medziphema nung Kirtan Bhawan semzüksü.

Iba sentong nung jembidang, Vindhya Basini Mandir otsü nung iba anogo ya alizüung tasen ka tongtetba mapang lir, kechiaser Kirtan Bhawan aser Hawan Kund semzükba yagi tanüla nung ainba aser nüburtem tangatetep nung aliba sayur, ta Angh La Ganesan-i ashi.

Iba Mandir ya February 1962 nung lapok ta angazüka Angh-i pelaba lemsatep aser iba Mandir ya küm 50 dak tema lir ta ashi.

Asür Vinezo Angami aser par kibongi ali tenlaba ajanga

tanü iba Mandir yangi nokdaka lir, ta pai ashi.

Kirtan Bhawan ya tamang aser bendanga agütsüba temaitsü lir, aser iba tesem nung külemkejaba ola tajung agi oshi oben balala jembir aser kin balala mulungjang nung kongshir, ta ashi.

Ibai asen sobaliba senmang tajung aser asenok ajak lungjemdaksüba tanüla nung masetshi amangba temaitsü ka lir ta ashi.

Hawan Kund ya hawan mesüra yajnas sentong agidang amshiba temeshi mimong ka lir, koba akhi Vedic rituals lir, kong mi apua amshir aser temeshi tesem ka ama züngshir aser yangji jangotzü, ghee, süngolio amala mi nung inoktsür aser

temeshi o jembir.

Ibai Hindu yimsü asoshi tongtipang lir, aser külemkejaba, tanüla meshitetba aser asüngtetba maparen inyaker, ta pai ashi.

Pai iba sentong nung adener ajunga dang kati ka asoshi bilema aser meimtepa alitsü ayongzük.

Tesendaktep tajung aser tesunep nung tera yanger tarutsü asoshi inyakang asenoki asen tetsü-tebou aser lenirtem shisatsü aser parnoki sayuba nem len anidaksütsü kanga tongtipang, ta Angh La Ganesan-i ashi.

Asenok aser tarutsü putu asoshi alima tajungba yanglutsü asoshi asenok ajak lungjemer inyaksüla, ta pai ayongzük.

Assam Rifles-i Meluri nung morok mi remseptsü

Dimapur, Rongchii/April 15 (TYO): Assam Rifles temi nüburtem den lenla balala nung yaritepa aruba nung shilem ka ama Meluri nung morok mi ajangrua aliba remseptsü asoshi tzü litres 9000 agütsüba den sepaitem mi remseptsü asoshi yoka liasü.

Iba den külemi Assam Rifles temi anasa aliba kibongtem nem

tajemtsü tzü agütsü, kechiaser parnok ajemtsü yua aliba tzü ya morok mi remsepba nung amshir liasü.

Meta talang nung iba ama teyari ya kanga nüngdaker, kong fire station mali aser yimdaklirtem tajemtsü tzü agi kanga anünger.

Iba mapang Meluri nung alir temi sepaitem den yaritepba

asere parnok dang pelaba lemsatepba ajanga Assam Rifles temi tarutsü anogotem nunga nüburtem den lenmang balala nung yariteptsü tali ajungmesor.

Parnokia Assam Rifles tem dang tarutsü anogotem nunga yaritsü ajungshi aser parnok tsüngta tesendaktep tali tashi itshitsü ayongzükba liasü.

Wokha nung polling ktdangsür den senden ka amen

Dimapur, Rongchii/April 15 (TYO): Deputy Commissioner & District Election Officer, Wokha, Ajit Kumar Ranjan-i April 15, 2024 nü Deputy Commissioner, Wokha indang Conference Hall nung Assistant Returning Officers (AROs), Sector Officers aser Sector Commanders tem den

shisadokden senden ka mena liasü.

Iba senden ya 18th Lok Sabha atema General Election 2024 agitsü aliba dak sendakba nung sentong balala agizüka lemsateptsü asoshi liasü.

Iba senden nung DC & DEO, Wokha menden liasü aser election tajungtiba nung shidak

agitetsü asoshi pai polling ktdangsürtem mapa angatetdakja liasü.

Paisa poll process nung general briefing, 72 hours SOP, P-2 polling stations dispatch plan, voting percentage & EDC, Dispatch/group plan aser danga tongtipang onüktem nung ajemdaker jembia liasü.



Mokokchung nung tanü 594/A CISF, G/111 BSF, E/11NAP(IR) aser B/D/E Coys 2NAP longjemer My Mokokchung nung tang aruya aliba Lok Sabha election nung nüburtemi ochishia tangatetba nung vote agütsüba ajanga süngjem süngjema agitetsü osang sangdonga Fazl Ali College nungi Imkongmeren Sports Complex tashi kilometre 5 shi tetsüng agi jajaa liasü. Iba jajaba sentong nung Superintendent of Police-i anir PS-1 aser PS-2 nungi aser District Administration nungita densema liasü aser iba mapang tangokba noksa nung angur.

TANUR KA SAMAR BUSHIR

Aoyim, Old Showuba, Niuland Road nungi March 30, 2024 nü arishi küm 12 tain **Kartik Tigga** (tebur) samar bushir. Nisung kari danga pa aliba meteta lira/ngura, mobile number 9362358230, 6909005712 nung osang agütsütsü akok.



Private School tasen lapoktsü atema application agütsüsü

Dimapur, Rongchii/April 15 (TYO): Directorate of School Education, Kohima nung April 1, 2024 nungi agütsütär aser May 31, 2024 tashi agütsütsü. Iba forms ya office mapang Room No. 421 (Planning Section) nungi meshitsü akok, ta sangdong ajanga ashi.

form tem Directorate of School Education, Kohima nung April 1, 2024 nungi agütsütär aser May 31, 2024 tashi agütsütsü. Iba forms ya office mapang Room No. 421 (Planning Section) nungi meshitsü akok, ta sangdong ajanga ashi.

Chümoukedima nung polling personnel atema 3rd phase training agütsü



Dimapur, Rongchii/April 15 (TYO): Lok Sabha asoshi agitsü aliba General Elections 2024 atema Polling Personnel atema 3rd Phase training April 15, 2024 nü Government Higher Secondary School, Chümoukedima nung agia liasü. ADC & AEO, Chümoukedima, Dr. Kuzonyi Wideo den ADC & AEO Medziphema aser Niuland nungertemi iba training semdanga liasü.

Iba mapang ADC & AEO Chümoukedima ajanga polling personnel tem dang election anogo booth nung amshitsü yimyatem sayua liasü. Parnok dang polling maparen tembangtsü aser machine tem meyiba bener aruba mapang kumdanga amshitsü yimyatema sayu. Iba training tatemi polling personnel nem ID card aser Appointment Orders tem agüja liasü.

Dimapur nung Lok Sabha elections atema training tatembangba agiogo



Dimapur, Rongchii/April 15 (TYO): Dimapur district asoshi aruya aliba 18th Lok Sabha elections atema tasem buba aser tatembangba training sentong Dimapur Government College, Dimapur nung April 15, 2024 nü agia liasü. Iba training mapang Dimapur-I, Dimapur-II aser Dimapur-III nung lemezükja

aliba presiding officers aser polling officers nem election duty certificate agütsü aser telok metetpelaba mapang agia liasü. Iba training tatembangba nung election ktdangsür jenti arua aden aser parnok dang election inyakyim, electronic voting machines (EVMs) amshiyim aser voter jangjaba yimyatem sayua liasü.

Kohima nung Postal Ballot agütsü tenzükogo

Dimapur, Rongchii/April 15 (TYO): Deputy Commissioner & District Election Officer Kohima, Kumar Ramnikant-i April 13, 2024 nü metetdaksüba ama 18th Lok Sabha election atema Absentee Voters Essential Services (AVES) category temi Postal Ballot agütsüba maparen April

15, 2024 nü tenzükogo. Iba maparen ya DB's Court, DC Office Complex Kohima nung amenoka aliba Postal Voting Centre (PVC) nung inyaka liasü. Postal Ballot ya anepdang 10:00 ako nungi nikongdang 4:00 ako tashi agütsür aser April 17, 2024 tashi alitsü.



Jammu, April 15, 2024: Jammu nung aliba Amarnath-i temeshi aini aotsü janrgr Hindu nungertemi registration agiba sülen tangokba noksa nung angur. Anogo 52 Amaranth Yatra ya June 29 nü tenzüksü aser August 19 nü tembangtsü.

Iran-i apuba India nungertem ajurutsü atema temelaba agütsütsü

New Delhi, April 15 (Agencies): Iran Foreign Minister, Hossein Amir-Abdollahian-i, tawa Strait of Hormuz nung Iran sepaitemi apuba rong nung densema alir India nunger 17 ajurutsü atema Iran-i India nunger ktdangsertem nem temelaba agütsütsü, ta metetdaksü.

Iran foreign minister Amir-Abdollahian-i phone ajanga India External Affairs Minister, S Jaishankar nem iba osangji metetdakja liasü.

Iba mapang nungji MSC (Mediterranean Shipping Company)-ia, rong nung apuba nisung 25 ji kümzüksü aser rong tanaben meshitsü atema parnoki tim ktdangsertem den inyakdar, ta metetdaksü.

Amir-Abdollahian-i, "Onoki apuba rong indang osang tejangja onoki bushidar. Rong nung apuba nisungtemji ajurutsü atema India nunger ktdangsertem dang melatsü," ta metetdaksü.

MSC Aries rongji Israel den tesendaktep lir, ta melung melemi Iran Islamic Revolution Guards Corps (IRGC)-i rongji pua liasü.

Iran sepaitemi rong apuba sülen White House National Security Council otongdar, Adrienne Watson-i, iba rong nungji India nungertem, Philippines nunger, Pakistani, Russia aser Estonia nunger liasü, ta metetdaksü.

PM Modi-i tamalen nangzükbatem mataloktsü: Mallikarjun Kharge

Puducherry, April 15 (Agencies): Hombarnü Congress party Tir, Mallikarjun Kharge-i, Ato kilonser Narendra Modi indang tenangzükbatemji tiyazü, ta ashi.

Puducherry nung Congress candidate, V Vaithilingam atema nüboyimtsüba sentong ka nung jembidang Kharge-i, "Pai (Modi) bendanglen aliba bank tem nungi ochimashi sen bener arutsü aser India nunger bank account shia nung sen lakh terpongungu (15) inoktsütsü, ta nangzükbata tu pai ataloktsür asü? Küm ter tashi küm shia mapa crore anana adokdaksütsü ta nangzükbata tu ataloktsür asü? Aluyimertem income anasü agi teimba kümtsütsü ta pai nangzükbata tu ataloktsür asü? Telangzübaji, 'mataloktsü'. Kodang ajakji mataloktsü südir Modi guarantee ji-a tiyazü," ta metetdaksü.

guarantee ji jenjang atuba azüoktsü, petrol aser diesel jenjang azüoktsü aser mapa manguba tebilemstü azüoktsü atema masü, ta ashi.

"Modi aser Shah (Union home minister Amit Shah) nati nüburttem ashioktsütsü meranger. Ajisiüaka Tamil Nadu aser Puducherry nung alirtemi pa tenangzükbatemji mamangtsü. Modi-i, Modi lira ajakji takoktsü, ta jembir. Süra kechiba pai osettsüset/chiyungtsü jenjang atuba maziükteter, mapa madokdaksüteter aser aluyimertem income anasü agi teimba mekümtsüteter?" ta pai asüngdang.

Congress Tirisa, BJP-i democratic inyakyim ajanga sorkar mekümtetba tesem nung ED ama central agencies amshia opposition party tem anema inyaker, ta ashi.

"Tang tashi nung BJP-i linük nung MLA 444 amokmerenogo mesüra alizükogo. Kong chief

minister tem, MLA tem aser MP temi parnoki aginüba ama meinyaklir parnoki item state nungji amokmerentsü atema Angh tem amshir. Iba ya Puducherry nunga atalokogo. Yamaji Tamil Nadu Anghia (R N Ravi) adianu Stalin (Tamil Nadu chief minister M K Stalin) amokmerener," ta paisa metetdaksü.

Paisa, Ram Mandir semzükbata sentong nung madenba atema Modi-i Sonia Gandhi tena densema Congress lenirtem aitsüogo, ajisiüaka sorkari (Ayodhya nung) Ram tekülem ki telungi aitsü atema scheduled caste nüburttem nem temelaba agütsü nung ang pai Ram tekülem ki semdangtsü, ta metetdaksü.

"Congress-i Ram tekülem ki asüba aser semzükbata anema nokdak, ta BJP-i nüburttem dang sayuner. Kü tenung Mallikarjun Kharge lir, koba tetezü Lord Shiva nungi jalokba lir," ta ashi.



April 15, 2024 nü Bhopal nung osangbenertem senden ka nung Madhya Pradesh Chief Minister Mohan Yadav den state BJP Tir, VD Sharma aser party lenirtemi taruba Lok Sabha election atema manifesto sayadang tangokba noksa nung angur.

Linük atema kü sentong tulu lir; shingaiya metsübuttsüla: PM Modi

New Delhi, April 15 (Agencies): Taruba Lok Sabha election nung BJP-i menden 400 dak tema ngura BJP-i linük temzüng melenshitsu, ta opposition party temi jembibaji tiyazü, ta shia Ato kilonser Narendra Modi-i opposition party tem dang BJP tebilemba onüktem tsübudaktsüba anenang, ta metetdaksü.

Interview ka nung jembidang Modi-i, "Linük atema kü sentong tulu lir, ta kodang ni shidir shingaiya metsübuttsüla. Nisung kar tsübudaktsütsü mesüra anema inyaksü atema ni telemtetba magir saka lenla ajak nung linük renloktsü atema ni telemtetba agir," ta metetdaksü.

"Timtemji parnok (opposition) dak keta lir. Parnoki linük ya yamai dang lidaktsüner," ta pai ashi.

Paisa, "Sorkartemi teti agia, onoki ajak inyakogo ta ashir. Onoki ajakbo meinyak ama ni bilemer. Ni tim lenmang nung ajak inyaksü merangogo, ajisiüaka ano teinyaksü aika lir. Kibong ajak nükjidongtem ni

koma ataloktsütsü, ibayongji iba ya tetendanger ka ama lir," ta ashi.

BJP-i linük temzüng yanglushitsu atema Lok Sabha election nung menden 400 dak tema nguner ta opposition-i tai tongloktsür.

Hombarnep West Bengal chief minister aser Trinamool Congress tongti lenir, Mamata Banerjee-i, BJP-i maneni sorkar kümra 2024 general elections ya linük nung tatembangbuba election asütsü, ta jembia liasü.

Mamata Banerjee-i, "Nenoki linük nüchiso kümzüknüra BJP agienang, yamaji asü nung ang linük ya nüchiso linük ka asütsü. Taruba election nung iba party yagi takok ngura tarutsü nungbo linük nung election malitsü. Iba sorkar ya tashi alia amshiba sorkar lir. Parnoki linük nung lenir ka, linük ka, oshi ka aser chiyungtsü ka dang aginer," ta ashi.

Tawa BJP MP, Anantkumar Hegde-i, linük temzüng yanglushitsu atema party-i menden tali aika nüngdaker, ta jembia liasü.



April 15, 2024 nü Dharwad nung Union Minister aser BJP lenir, Pralhad Joshi-i Dharwad Lok Sabha menden nungi tokteptsü atema arudang pa agizükba noksa nung angur.

Lok Sabha election tenzükbata mapang nunga Kejriwal jail nung alitsü

New Delhi, Rongchii/April 15 (Agencies): Lok Sabha election tenzükbata mapang nunga Aam Aadmi Party (AAP) tongti lenir aser Delhi Chief minister, Arvind Kejriwal jail nung alitsü, kechiyong Hombarnü Supreme Court-i Kejriwal temepishiba ken o April ita tatembanglen ang angadangtsü telemtetba agiogo.

Hombarnü Supreme Court-i Enforcement Directorate (ED) dang Delhi chief minister Kejriwal-i pa apuba anema agütsüba temepishiba ken o dak sendakba nung April 24 tashi nung telangzüba agüjang, ta tuyuogo.

Ano tanga osang ka nung, Delhi court kati Arvind Kejriwal April 23 tashi judicial ket nung ayutsü mapang atsülanga tetuyuba agütsüogo.

Hombarnü Supreme Court-i Arvind Kejriwal-i agütsüba

temepishiba ken oji April 29 nungi ang tenzüka angadangtsü lemtetogo.

Kejriwal atema ken o jembitsür senior advocate, Abhishek Manu Singhvi-i Supreme Court dang, election nüboyim nung shilem magidaksütsü nükjidong nung Kejriwal apu, ta ashi.

Tamalen Delhi excise policy ochimashi ken o dak sendakba nung March 21 nü ED-i Delhi Chief Minister, Arvind Kejriwal pua liasü. Tang pa Tihar jail nung lir.

Taruba Lok Sabha election atema AAP-i tongti lenir, Kejriwal medeni nübo yimdar. April 19 nü Lok Sabha election tenzüksü aser Delhi nunga Lok Sabha menden 7 atema May 25 nü election agitsü. AAP sorkar aliba Punjab nunga June 1 nü election agitsü.



TIR YIMYIM YIMOBILEM (EDITORIAL)

DIMAPUR SANGTENNÜ, APRIL (RONGCHII) 16, 2024

Nagaland sadangogo

Tang tashi Nagaland political map-bo mesadang aser memelenshii lir saka tang aruya aliba Lok sabha parliamentary election nung Nagaland anüdoklen district trok nung alirtem vote enoktsüi maotsü lemtetba yagi tang Nagaland nung alir tebilemba aser nükjidongbo ana ksuma sadangogo. Chuba yimli mesüra kin kidong tenüng nung nisung kar shiteta yimsü sädaktsüba yimli ka masü saka nübortemiang pei madak yimsü asütsü asoshi yimsüsürtem shimba yimten yimli, democracy, nungbo yimten sentong tongtibangtibaji election ya lir, anungji iba nungdakji metetsümonga election nung madentsü lemtetra, iba jagi kasa lima mesüra kasa state nung süaka yimten ana akümer asütsü. Aji oda, Nagaland tenüng nung Lok sabha tatar hohoi tatar ka shimteter yoktsü asoshi tan April 19 nung election agitsü aser iba election nungji Nagaland anülulen alirtem dang shilem agitsü amaika kümogo, anungji anülulen alirtemi shimer yokba nungji kasa kin aser kasa nebortem süaka anüdoklen alirtem shilem malitsü. Naga nung yimten nüchiso bushirtem nüchiso bushia - bushia telokang tapu ter metsüka kuma lemsar alidang, ano Nagaland state agi peisasa ana kuma sadangtsüsa atalokba mapa yagi Naga nung yimten tebilemtsü ya koba tama ser koba tesü asütsüar mebentetteti ka kümogo aser shirnok den tama jembir, shirnok denbo tesü jembitsüar meshitet ka kümogo. Atangji, ibaibo Naga nungertemi asenoksasa benja masü tangar kari arua benjatsü amai benjatetogo. Ashiko, alemli Shinar lenden lima nung nisungtemi anüng tonga tua lungki yanglutsü tenezük dang parnok o parnok na mangatetteptsüsa Tsüngremi oshi balala kümdaktsü amai, Naga nungertemibo külemi longjema linür saka Naga nung mulungsentsü aser mapa ngur Tsüngremi Naga nung agi telok metsü dak tali kuma lemsatsür külenang ano Nagaland agi ana kuma sadangtsür asü (?) ta shisadangtsüsa adoker. Atangji, asenok meputep aser mangatettep adokba ajak Tsüngrem dang atongtsüa mali saka jungnüseta majung aser longjemnüseta melongjemtet balala alitsüsa kuma oa angubaji alima nung Naga nung ya ka asütsü. Atangji, Nagaland nung shinga kin-a state government dak temulung asüba mali, kechiyong küm aika asenok sen agi vote alia election agili, election temer külena pei kisüng agitsü senotsü bushilen dang senzülü ta Nagaland nung Noklak nungi Dimapur tashi aser külen Mon nungi Kohima tashi nung nübortem anisüngzüktsüsa tagitsü terenlok mapatem inyakbabo mangur. Aji oda, tesem kar nung lenmang aser kiojen kar yanglua lira, itemji sen crore ka agi renemtsüba mapa sen crore ter endoka renemba mapatem dang asütsü. Iba ama tensa tia ka nung Nagaland anülulen alirtem dang nungibo anüdoklen alirtemang temulung machiba aser mepelaba akümbaji tim danga ta angateter, kechiyong kasa merenlokasa asüyonga Nagaland anülulen o anüdoklen na ya asadangteptsüla masü, anüdoklenbo Nagaland tenüng nung arok atema inyaktsüba mapa kecha mangur. Iba jagi balaka Naga nung anüdoklen purtem mepelar. Ajisüaka, iba tamakokjibo alemtsüka asünunga Nagaland anüdoklen aser anülulen alirtem kasasa alemtsüsa adoktsü, kechiyong Nagaland yimten yimsüsüba aser terenlok sentong yangluba ajak nung, Nagaland anüdok – anülü kecha mali, ajak dena lir. Aji oda, rangben yur junga anepalu mesütet raksadaktsütsü agibo ana kuma sadanger tagitarutsü tajung kuma jungjunga anepalu tajungba asütsü. Atangji, alima aser nübortem asoshi tajungba inyaktsü atema alinük agi ana- asem kuma sadangbajia tim dang saka alinük kisüng sadanger nisung mulungjang nung pei lima aser nübortem meimba shisatsü melira, ali kisüng sadangba agibo tebilemba mataloktsü.

OLEMSABANG

Yisu dak amangba pur ajak dangi

Ne Senti Vote nung Alima Kümzüktsü Tashi Tulu Lir

Tsüngremi pa mesükba nung yangluba taküm ka nület setoktsür nok agi tekong tangzükter mapa tajung ka inyaka takok tulu angu ama konang tulu bener oh hoi, oh hoi ta molushia tsüngsangtepba kin; atangji shiruru dena tamajungba jenjang nung aliba Naga kin (*tongtibangsa Ao kin*) dangi ajak metetsang Tsüngremi America nungi kotak tenyar ka ama Edward Winter Clark jateter tekong, tenem, lenten aser tzüyim ajanga anir arua Yisu tekümtet aser nüchi osang sangdonga asen nübör shiruru jenjang nungi nüchi jenjang melentsü.

Ammang kanga temelem, kati ka angutsü mokoki aliba mapang anüng nung petinu tila ka kinük külen ting ta adok ama asen kin asoshi ibai shingaiia magütsütetba tematiba tesangwa liasü. Iba tesangwa ajanga nükpok kin tenük lapoktsü, mangsa kin sobutsü tajung melentsü, ashimetet maka, asen kidanger Assam nungeria kanga nemja, tiluja aser menüja beshiba kin; saka tanübo alima kinük ajakleni oa atongsemtettsüsa temaba jenjang renemtsüogo. Iba jenjang ya Yisu-i bener aruba Khristan yimsü ajanga lir. Shingaiia aji nunga ta meshitettsü kechiaser aji tsüngchi tatalokba lir.

Saka tanü asen kin nem nüchi agütsüba Khristan yimsü lendong tulu nung lir, amokmeren tulu nung lir. 2014 küm nungi India nung BJP aser RSS ajanga yimsü asütsü tenezükter India nung Yisu dak amangba purtem jenti rishikangshi tulu nung lir. 2023 küm tenezükter mezüng ita 8 tsüngda nung Yisu dak amanger rishikangshiba 525 ben tashi tatalokba liasü. Tetezü anogoshia tamangertem 2 tema dak rishikangshiba liasü. United Christian Forum ajanga ashiba agi 2023 küm India nung State 28 rongnung 23 nungbo tamangertem rishikangshiba liasü. Evangelical Fellowship of India ajanga ashiba agi taoba küm tamangertem tongtibangsa pastor-tem yazü kuli yanglua 520 tashi police-i apuba liasü. Tanüa pastor-tem aika tepuokdak balala nung lir.

Kidanger Manipur-ji repringang, May ita 2023 nü nungi tenezüka kin ana tongtibangsa Hindu Meitei aser Khristan Kuki na tsüngda rara adoka nisung 100 tema taküm samaogo, yimtsüng 160 nung ki 4500 shi mitsü kuma rongdokogo. Iba den tenla ki 253 rongdokogo. Tesüngmangtsü rongnung kaji Imphal yimti nung Meitei Khristantem tenla ki tashi rongdoktsüba liasü. **Tetezü** kin ana tsüngda raraba dang masü saka Yisu dak amangertem samatsütsü inyakba nükjidong tulu liasü ta iba tatalokba ajanga metetsür. Saka tanü tashi India Prime Minister Narendra Modi-i Manipur semdangtsübo doktsür tebanga melashii lir.

Ano asen kidanger Assam nung February 10, 2024 nü Hindutva telok *Kutumba Srakshya Parishad*-i missionary School-tem ajak nung Khristan tamaittsütem, Yisu aser Mary noksa dena agizüktsü amokmeren tulu agütsüogo. Iba den Assam nung tanebtsüba mapa meinyaktsü February 26, 2024 nü Assam Assembly nung renemogo. Item ajak ya Yisu dak amanger dak rangloker inyakbatem lir. Ibaji dang masü Khristantem asoshi tongtibangtiba anogo ana Yisu asoba anogo (**Khristmas**) Good Governance Day asütsü sangdong, taküm Yisu shia aruba anogo (**Easter Sunday**) mapa inyakba anogo asütsü ozüng agütsü. Item tatalokba ajak yagi tanü asenok Yisu dak amangertem lendong tulu nung lir ta kuli tejangja angur.

Tanü Hindutva nükjidongji **linük ka** (*one nation-in one State*), **sobaliba ka** (*one culture*), **tamangba yimsü ka** (*one religion*), **oshi ka** (*one language*) lir. 2014 nungi BJP aser RSS-i yimsü süa arudang item nükjidongji atalokdaktsütsü mechi tashi ajak amshia India lima nung tanü lokti yimten (*democracy*) tebilemtsü jenjang tulu nung lir.

Iba tebilemtsü tulu agi asenok amokmeren dang, Yisu dak amanger ka ama asen teinyaktsü tulu lir. Naga lima nung Lok Sabha Election April 19, 2024 nü agitsü lir. **Iba election nung Yisu dak amanger rishikangshiba telok nungi asen lima, asen nübör aser India lima ajonga kümzüka ayutsü ne senti vote dak tashi tulu lir.** Anungji, 19th April, 2024 anogo nungji senso tajung ajaki tanü alima ajonga amokmerenba telok anema tasüita polling Station-i oa pei vote pei agütsütsü tasüita shilem agitsü mepishir. Tatem nung ya mamali, na aser ni shiruru jenjang nungi nüchi agütsüsang Yisu Khrista mamai iba election nung shilem agitsü ayongzükter.

-Ao Baptist Pastors' Fellowship.

- Yimozülur dangi -

April 14 Adok nung, "Congress government-i Missionary-tem aridok: Metsubo" azungdang Ao yimsu tejento anosa lir-asuna da tasungdangbatem arua zungogo.

Indian history nung 1858 nungi 1947 tashi nung India nung ajunga Indian National Congress lenisuba kubok ka kuma longjemer India nungi British yimsusuba meindoker pei sasa yimsu asutsu nukjidong nung raraba otsutem lir aser iba rara 1947 kum-ang tempangba otsu lir. British yimsusuba mapang Europe nungi dang masu North America nungia nisung tajunga, tamajunga aruba record-tem aika dang lir. Naga nung atemabo America nungi Baptist Missionarytem arua naga nung amang tia nungi nüchi dangi anitetba otsutem lir.

1980 tatemlen nungi 1990 tatemlen tashi onoki kanga sapua azungba news magazines Frontline, India Today aser Sunday amala copy aikadang tang tashi ku den lir aser itemji repringa post-Indepence Indian Politics ajunga Congress I-i anishiba otsutem lir. Election-i aitsu atema Congress ticket angutsüsubaji hon-korang raktepba ama zungteter. Election nung tokteptsüba-dang masu adoker-a portfolio angutsu mesura Congress Working Committee nung zungsem ka akumtsu atema Indian Independence Movement nung shilem agiba record tejangja den Gandhian Cap asema (wearing a Gandhian Cap) ji ID card ama zungshiba otsutem lir. Onok azungba mapang naga lima nunga Congress-I, SC.Jamir aser NI Jamir amala tenungtem kitchen name ama, Constituency kar nungbo Congress ticket magutsüba agi party toktsüba otsutem lir. India nungi Missionary-tem Congress government-i aridokba masu ya 1858 kum nungi India nung ajunga mangdang, ternemba, nukjidong aser sendong liasü. Iba mapang Neiprio Rio aser Metsubo nung liasü-asubo American Missionary-tem maridoktsüba liasü. Kanga sasar.

Election nung vote angutsu atema pei otsu dang masu tangar otsua dena pei taginuba den apet yanglua jembiba yagi nisung ka nubor lenir tajung masu da sayur. Nagas need statesmen not politicians.

- B.Wati, Chümoukedima

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Sydney nung Tenla ki ka amakdang putir den nisung 4 yiru



April 14, 2024 aonung 7:15 ako meta Australia yimtiba, Sydney nung aliba Christ The Good Shepherd Arogo Tenla kidang nisung ka sabangi tua putir, Mar Mari Emmanuel amakdang tangokba noksa nung angur.

Sydney, April 15 (Agencies): Amongnü aonung 7:15 ako meta Australia yimtiba, Sydney nung Tenla ki ka amakdang putir ka densema nisung pezü yiruogo.

Nisung kati Wakeley nung aliba Christ The Good Shepherd Church Tenla ki amakba tatalokbaji Arogo indang YouTube page nung live sayua liasü. Nisung ka Tenla ki telungi aiba sülen sabangi tua putir dak aiben atsüngba mapang nung Tenla kidang alirtemi pa kümzük.

Iba tatalokba nungji putir densema nisung pezü yiru.

Bishop, Mar Mari Emmanuel-i Tsüngrem O jembiba mapang nung nisung ka sabang jagi tua pa amakdang Tenla kidang alirtemi sabangi tua nisungbaji aziokteta liasü.

Putir, Mar Mari Emmanuel ya kang nüngtugu sayutsüngir ka lir, aser pai sayutsüngiba video tatsü aika YouTube nung angutsü.

Iba tatalokba sülen New South Wales Police-i Khristantem amaksangji apu.

Anogo ishika tejaklena nisung kati Sydney nung aliba Westfield Bondi Junction shopping centre amakba mapang nung nisung trok tepset; tesülen police-i arrshi küm 40, Joe Cauchi khaset.

New South Wales Police otongdar kati, "Hadir ka amshia Tenla kidang Khristantem amakba sülen police-i bushisüngdang tenzükogo," ta metetdaksü.

"Iba tatalokba nung yirurtemji New South Wales Ambulance paramedics-i yaridar," ta police

otongdarisa metetdaksü.

Wakeley nung aliba Christ The Good Shepherd Church Tenla ki ya, anogo ishika tejaklen amakba Westfield Bondi Junction shopping centre nungi mile 20 shi dang pilar lir.

Emergency services Tenla kima tonga aruba sülen lokti tulu adenshia tejashi nung yimyim ayimba den külemi police den-a raratepa liasü.

Osangbener den jembidang local mayor, Frank Carbone-i, "Police-i parnok teinyaksü shilem inyaksü, anungji asenoki police nem timtem magütsüli. Asenok tensa mapang tamajung ka nung lir, anungji nüburtem jashibaji ni angateta dang lir, ajisüaka mayor ka ama ni nüburtem dang süngjemtsü mepishir," ta metetdaksü.

Nepal nung Khristan telok anati sorkar tetuyuba aitsür

April 15, 2024: Nepal linük nung sorkari tamangba yimsü dak sendakba maparen balala nokdangtsü tetuyuba agütsüba sülen Khristan telok anati sorkar sashia aitsüogo.

Sorkari tetuyuba ka agütsübaji Khristantem aser linük temzüng nung aliba yimsü temeden anema lir, ta April 12 nü Nepal Christian Society (NCS) aser National Churches Fellowship of Nepal (NCFN) nati külem sangdong ka ajanga metetdaksü.

"Nepal ya secular linük ka saka minorities, talisa Khristantem bendanga züngshir aser reshikangshir. Sorkari Khristan temedentem nokdangtsü meranger," ta parnok metetdaksü.

April 7 nü Nepal Federal Ministry of Home Affairs-i district administration 77 dang nija mesüra organization balalai yimsü dak sendakba lokti senden agiba, yimsü ajungkettsütsü aser tamangba yimsü meyipdaksütsü atema orientation programs ayongzük agiba nokdangtsü tuyua liasü.

Ministry-i ketdangsertem dang item ama sentongtem nokdangtsü aser aibelenertem nem temerenshi agüjang, ta tuyu.

Kasa tetuyuba ajanga linük nung bendangertemi tamangba yimsü dak sendakba sentongtem agiba mita repringtsü aser nokdangtsü tuyu.

Home Ministry nung otongdar, Narayan Prasad Bhattarai-i, "Tamangba yimsü ajungkettsüba aser tamangba yimsü meyipdaksüba kanga bulua kümдар, ta nisung kati agütsüba ken o nung ajemdaker sorkari iba tetuyuba agütsür. Linük temzüng ajanga itemji memelar," ta metetdaksü.

"Linük temzüng kübok temeden shidak amshitsü aser yimsü ajak kümzük ayutsü nükjidong nung sorkari iba tetuyuba agütsür," ta paisa shisem.

Sorkar tetuyuba nungji tamangba yimsü kecha tetshia mali, ajisüaka Khristan lenirtemi iba tetuyuba ya Khristantem anema lir, ta bilemer.

NCS secretary general aser

Pastor, Dilli Ram Paudel-i, "Khristantemi tamangba yimsü meyipdaksür ta tiyazü nung tai tonglokja Khristantem anema inyaksü nükjidong nung iba tetuyuba ya agütsür," ta ashi.

Nepal linük temzüng ajanga senso ajak nem yimsü temeden agütsür, ajisüaka kangshia tamangba yimsü meyipdaksübabo ozüng alema lir.

Pastor-isa, "Joko onoki sademsadema ozü yimsü mebeshitetsü aser Yisu indanga mangashidangertem den Yisu indang melemsateptetsü. Joko ketdangsertemi Tenla kidang tekülem sentong agibaa tenük yoka repringtsü," ta ashi.

Family of God Church nung Pastor, Tanka Subedi-i iba tetuyuba nung sorkari yimsü kecha tetshia mali, ajisüaka iba ya Khristantem anema lir, ta metetdaksü.

Anogo ishika tejaklen ang Nepal nung Hindu telok kari Nepal linük temzüng nung 'secular' agienba sülen Nepal ya 'Hindu linük' ta sangdongtsü atema takhangba agüja liasü.

ANOGO ABEN TSÜNGREM DEN

Putirtem aser Chubatem

"Aser ozü Tsüngrem dangi parnok yimli ka aser putirtem kümdaktsu; aser parnoki alima nung yimsü asütsu". J. Adok 5 : 10.

"Nenok shisa buluba ajak Pa dak yuang, kechiaser Pai nenok asoshi anebalur". 1 Peter 5 : 7. Putirtem Levi aser Aron kibong nungi aser chubatem Yihuda Kidong nungi aru. Chubai putir mapa inyakra Tsüngremi merenshi.

Kibuba Yisu Khristabo chubatem madak chuba aser Temaba putir ama Israel aser arogo asoshi amen.

Khrista Yihuda kin nungi aru nung Pa Aron kibong nungi adokba putir ka ama amentsü makok. Pa putir akümbaji balaka. Pa Melkizedek tsütsü nungi aru. Khrista shia aruba ajanga teti tatem maka putir aküm. Paji chuba putir shibai teti yimsü asütsü aser tenzüktsü.

Khrista dak iba telungjem ali nung, tamangertem ajak Khrista nung putirtem aser chubatem ama lungjemer. Asenok nem pa taküm agütsü aser pa asüba, aremba, aser shia aruba aser Kotaki atuba aser menden den lungjemdaktsu. Asenoki iba jenjang asen tenzükba mapa lungjemba ajanga angur. Jungkai Adokba 5: 10 nung asenoki Khrista den yimsü asütsü ta bilemtetdaksür. Asenok Pa den yimsü asütsü. "Putirtem ama tenüngsang tenla maneni agutsütsü asenok aja ta kodanga mamadoktsula.

Mumbai High Court-i Khristan putir ka maitsüi obendang agütsü

April 15, 2024: India kübok Goa state nung Khristan putir kati akhidang Hindu nunger Chuba ka mezüngmeshiogo, ta tai tonglokja pa anema ken o benoka liasü, ajisüaka April 12 nü Bombay High Court Goa Bench-i iba ken oji agientsüogo.

Police-i Goa & Daman archdiocese nung putir, Bolmax Fidelis Pereira anema ken oji benoka liasü, ajisüaka division bench of Justices- M S Sonak aser Valmiki Menezes nati, iba ken oji tajemdakdak mali, ta shia ken oji agientsüogo.

Putiri sayutsüngidang jembiba oji kar jashidaksütsü nükjidong nung jembiba o masü, ta shia court-i ken o benokertem dang ang meyiper tasüngdangba aka.

High court-i iba ken o angadanga aruba sülen January 15, 2024 nü tembanger liasü saka April 12, 2024 nü ang tatembangbuba obendang agütsü.

Yaküm July 30 nü (Amongnü) sayutsüngidang Pereira-i akhidang Hindu nunger chuba kati tamangba yimsü ajak akhümtsübuba atishia jembia liasü.

"Shivaji Chubai shinga bendangshidanga mezüngshi. Pai nübur ajak agizük. Pa ya tongbang rarar ka aser linük atema lenir ka liasü. Nisung kari pa ya tsüngrem ama züngshi. Ner medemer dang

Shivaji ya ner Tsüngrem asü linük lenir ka liasü ta asüngdangang," ta Pereira-i jembia liasü.

Ajisüaka Hindu yimsü alia amangba telok kati pa indang video ji shilem kar dang agiteter, "Shivaji ya Tsüngrem masü," ta shia putiri Hindu yimsü mezüngmeshiogo ta tai tonglokja liasü.

April 15 nü osangbener den jembidang Pereira-i, "Ni ajemalua iba obendangji (court obendang) agizüker. Linük temzüng kübok agüja aliba temeden aser ochi pusemer ajak dang ni pelar," ta metetdaksü.

Court nung ken o angadanga mapang Pereira-i, "Ni metetsümongabo shinga melung meyirutsü. Tamangba yimsü nung ajemdaker asenok tsüngda telemsa adokdaksütsüsa shinga nem-a meinyakdaksüli," ta jembia liasü.

Khristan Crispino Fariac-i, "Iba ken o ya yimtenren nung ajemdaker benokba lir. Hindu telok kati tiyazü ken o nung putir pudaktsünua liasü, ajisüaka ochi jungkai adokogo," ta ashi.

Yaküm Hindu telok kari rongshiba nung ajemdaker August ita nung police-i putir anema ken o benokba sülen putir-i local court ka dang pa maputsü mepishi aser Mumbai high court nema temepishiba ken o agüja liasü.

AO OSHI ANGAZÜKDAK: TANÜ ANGAZÜKTSÜBA OJANG



Sünem

(v) jashi anenba (cool down one's anger)

* Tambusangi pa jashi sünema tanurtem merenshi.

Sünen

(v) tezü atsüa inyakba (vindictive act)

* Tanutsülai tsürabur ashi mangai sünen-süraa inyak.

OLONG PAITEP # 6758

Grid for OLONG PAITEP # 6758 with numbers 1-17 in a 5x5 layout.

TIPLÉN

- 1. Nüji masü - (4)
3. Technütsüka - (6)
7. Aketa shirangba - (5)
8. Pi - (6)
9. Amena - (5)
10. Kinü - (5)
11. Tanang masü - (5)
13. Lenmang - (6)
15. Nübo tedi - (5)
16. Tuoshi - (6)
17. Shiruru apuba temenatsü - (4)

LANGTSÜNGLEN

- 1. Jila tulu - (5)
2. Sarasademdang tembang - (4)
4. Tarutsü indang ashitem - (6)
5. Alia - (5)
6. Mojing - (5)
9. Tai inyakba metet - (5)
10. Medemer chijiba - (6)
11. Tatokba / Amadok - (5)
12. Anüngdang masü - (5)
14. Jabaso masü - (4)

OLONG PAITEP # 6757 TELANGZÜBA

TIPLÉN :

- 1. Tesangra, 5. Mungo, 7. Kisen, 8. Salem, 12. Semki, 14. Kilem, 15. Kensü, 16. Sangpang.

LANGTSÜNGLEN :

- 1. Temesen, 2. Raksa, 3. Aon, 4. Aso, 6. Nile, 9. Alizüng, 10. Omen, 11. Lemta, 13. Ola, 14. Kin.

NAI-A YA METETTER MA



Lithuania nunger Mykolas Alekna-i April 15, 2024 nü Men's Discus Throw nung world record yanglutetogo. Oklahoma nung Ramona Throws Festival nung Mykolas Alekna-i 243 feet, 11 inches (74.35 meters) mereptoka liasü. Germany nunger Jurgen Schult-i June 6, 1986 nü 243 feet (74.08 meters) merepteta Men's Discus Throw otsü yangluteta aliba Alekna-i ajangetetogo. Arishi küm 21 tain Alekna ya University of California nung junior ka lir aser World Outdoor Championships nung anaben tashi medal nguogo.

Happy Birthday section with details for Molungsunep, including date (April 16), age (1), and location (Merangmen Tzurangkong). Includes a photo of a baby.

Imphal nung Amit Shah'er sentong anema lungkak ait



Imphal, April 15, 2024

(Agencies): Manipur kübok Imphal nung tetsürtemi lenmang mokdang aser Union Home Minister Amit Shah'er sentongi aoba garitem noktanga liasü.

Tetsürtemi garitem aser nisungtem Amit Shah'er election campaign-i meyoktsü atema tyres rondok aser gari lenmangtem mokdanga liasü.

Amit Shah-i Manipur

semdangsü aliba jakdang Imphal West aser Imphal East nung nisungtemi lungkak ait.

Tanü nikongdang 1:00 ako meta Imphal East District kübok Lamlong nung lungkak aitertemi Hapta Kangeibung nung BJP election public sentong nung medendaktsü atema garitem mita reprang.

Ano, Imphal East district kübok New Checkon nunga

lenmangtem noktang aser tyres rondok.

Ajisüaka sepaitemi tensa azüok aser lendong balaka matalok.

Amit Shah-i Manipur semdangba ya benjungba mapang masü saka temlung tezü atangba mapang ka ta lungkak aiter kati ashi.

Tesüiba ita 11 tashi Manipur nung nübertem timtema arur aser ajaki mulungba lemtet ka agitsü melena Amit Shah-i election mapang state semdangba ya aitsür ta lungkak aiterisa ashi.

Amit Shah-i Manipur semdangba atema pelashishia agizüktsü nüngdak madoker kechiyong pai tensa atema masü saka election atema dang arur ta paisa ashi.

Manipur nung nisung kari Amit Shah aruba anema noktakaka nisung meyrjang aika iba sentong nung denogo.

Hindu nungeri Gaurav Gogoi nem vote meinoktsütsü: Badruddin Ajmal

Guwahati, April 15, 2024

(Agencies): Congress lennir aser Assam MP Gaurav Gogoi-i tawa Eid benjungmong nung Namaz sentong nung shilem agiba All India United Democratic Front (AIUDF) tanishir Badruddin Ajmal-i aitsüogo.

Hindu nungeri Congress lennir Gaurav Gogoi joko meyaritsü aser Muslim nungera

pa inyaksangshi ajanga atsur maotsü ta Ajmal-i ashi.

"Kanga junger, Gaurav Gogoi joko Muslim nunger kümogo aser Hindu nunger shingaia pa nem vote meinoktsütsü" ta AIUDF lenniri ashi.

Congress lennir Gaurav Gogoi-i "political theatrics" inyaker saka pai inyakba mapa ajanga Muslim nunger atsur

maotsü ta Ajmal-i metetdaksü.

Nagaon nung election campaign sentong ka nung Ajmal-i Muslim nunger vote enoktsürtem dang Gaurav Gogoi nem vote meinoktsütsü ayongzük.

Gogoi-i Eid Namaz nung shilem agibaji yimtenren tsütsü tajangzük angutsü atema inyakba mapa ka lir ta Ajmal-isa ashi.

Kangpokpi nung CoTU-i anir nisungtemi sorkar office tem shibangtsü

Imphal, April 15, 2024

(Agencies): 18 buba Lok Sabha election mezüngbuba shilem agitsü anogo ishika dang lia Kangpokpi District Headquarters nung sorkar office tem shibangtsüogo.

Phailengmol nung nisung ana tepsetba sülen Kuki-Zo nungeri tejashi nung iba mapa inyak.

Kangpokpi District Headquarters nung sorkar office ajak shibangba mapang Union Home Minister Amit Shah-i tanü Imphal semdanga liasü.

Committee on Tribal Unity (CoTU), Sadar Hills Kangpokpi District-i anir nisungtemi Sadar Hills Autonomous District Council, Zonal Education Office (ZEO), Town Employment

Exchange ama office tem shibangja liasü.

CoTU lennirtemisa District Election Officer aser Deputy Commissioner Mahesh Chaudhari den ajurutep aser Phailengmol nung nisung tepsetba osang lemsatop.

CoTU lennirtemisa Mahesh Chaudhari nem takhangba kar agütsü aser iba nung Phailengmol nung nisung tepsetba bushisüngdang asütsü aser Hombar aonung tashi nung volunteer mang ana parnok ket nung agütsütsü takhangba agütsüogo.

Taonung tashi nung Kuki-Zo Village Volunteer tasümgangtem magütsüra April 16, 2024 nungi

DC/DEO Kangpokpi office shibangtsütsü ta CoTU-i metetdaksüogo.

"Public-i lungkak aita tanü district headquarters nung sorkar office ajak shibangtsüogo aser ozü Kuki-Zo volunteer mang ana taonung magütsüra asüng nungi DC/DEO office shibangtsütsü" ta CoTU Media Cell Coordinator, Lun Kipgen-i ashi.

Kuki-Zo nunger tesüiba ita 11 tashi timtem aruba ya Chief Election Commissioner of India-ia metetsüla ta pai ashi.

Onoki ahangba ama meinyakra district kübok subdivision shia nung sorkar office ajak shibangtsütsü ta Lun Kipgen-isa metetdaksü.



Assam nung Kamrup district administration-i arishi küm 105 tain Ramati Baishya nem tetushi agütsüba angur. Kamrup district commissioner aser district election officer Keerthi Jalli-i anir ketdangsür telok kati April 14, 2024 nü Dalibari yimtsüng nung Ramati Baishya den ajurutepa liasü. Rongali Bihu aser Assamese New Year nung district administration-i Ramati'er kidangi ao aser lai election nung shilem agitsü ajungmesoba atema tenüngsang agütsü.

Tanzania nung tzümetsüng agi nisung 58 süogo

Dodoma, Rongchii/April 15 (Agencies): Tanzania nung tesüiba hopta ana tsüngta tzümetsüng agi nisung 58 takum samatsüogo, anungji iba East African linük nung tongtipang ki o jen project tem nungi telangzüba bushir.

Sorkari nisung asü-amaba osang ya Deobar aonung sangdong, kong tzunglu tesashi maneni arur. Tanzania nung tzungluruwa April ita ya tiyong lir aser taküm El Nino yimya ajanga tali tesashiba kumdaktsü, koba agi alima nung tzungsarusa aser tzümetsüng adokdaktsür.

"April 1 nungi April 14, 2024 tsüngta tzunglu kanga sashia aruba ajanga tzümetsüng adoka nisung 58 asüba lir aser tzükumlen aliba tesemtem nung

tesashiba kongshi," ta sorkar odongtar Mobhare Matinyi-i osangbener senden ka nung ashi.

"Tzükumlen aliba region nung tzümetsüng tesashi adoka tang tashinung nisung 11 süogo," ta pai ashi.

Tzümetsüng nungi kumzüka alitsü asoshi tarutsü nung Tanzania-i tzu nokdang 14 yanglutsü sentong lir, ta odongtari ashi.

Ita pezü tejekdang norther Tanzania nung tzümetsüng adoka nisung 63 asü, aser iba mapangjia anentsüh tesashi alua liasü.

Hokulbarnü linük north tsütsü school bus ka tzu agi mubanga aliba longren kati aluba sülen school tanur ti tzu nung arakseta asü. Iba rescue

operations nung volunteeer ka asü.

Tzümetsüng agi nisung 126,831 dak kongshi, ta Matinyi-i ashi.

Tzükumlen aser economic capital, Dar-es-Salaam nungi mile 124 shi pilar Morogor tesem nung aliba alu 75,000 dak tema raksatsü.

Iba tzümetsüng agi kongshir alirtem nem chiyongtsü densema nungdakba osettsüset lema agütsüogo.

East Africa kübok tesem dangalena tzunglu kanga sashia arur. Tanzania kidanger Kenya linük nunga tzümetsüng agi nisung 13 asüba osang lir.

Ki o jen tema raksatsüogo aser tzümetsüng adoktsüsa tesemtem nung alirtem dang ainshitsü ajungshia liasü.

Iran Tir Raisi-i April 22 nü Pakistan semdangtsü

Islamabad, Rongchii/April 15 (Agencies): Middle East nung tensa tamajungba küma aoba mapang ka nung Iran Tir Ebrahima Raisi-i April 22 nü Pakistan semdanga Ato Kilonser Shehbaz Sharif, Tir Asif Ali Zardari aser military lenirtem den sensak asemtsü, ta Hombarnü media sangdong ka ajanga metetdaktsü.

Israel-i Syria nung Damascus consulate anunglen nungi maka Iran indang Islamic Revolutionary Guard Corps commander tejen ana

densema nisung ishika tepsetba atema telangzüba agüja missile aser drone 300 dak tema Israel dak khaloktsüba sülen anogo ka lir tang arishi küm 63 tain lenir yagi Pakistan semdangtsü imlar, ta Geo News sangdong ka janga metetdaktsü.

Pakistan aser Iran na taküm küm tetenzüklen mangatetep adokba sülen tang tesendaktep yanglushitsü merangba mapang ka lir, aser ibayongji Iran Tir-i Pakistan semdangtsü aliba ya kanga tongibang lir.

January ita Iran-i arrtsü adener tesem kar amakba atema telangzüba agüja Pakistan-ia drone aser missile amshia Iran nung kiralongrartem maka liasü, ta osang ajanga metetdaktsü.

Pakistan kübok Balochistan province nung Sunni Baloch telungpur telok 'Jaish al-Adl' indang tamendakdak ana missile aser drone amshia makogo, ta iba mapang Iran state media sangdong ka ajanga metetdaktsü.

(Maneni tapak 8 nung...)

May ita Singapore Ato Kilonser Lee mapa yutsütsü

Singapore, Rongchii/April 15 (Agencies): Küm 20 Singapore ato kilonser mapa inyaka aruba sülen Lee Hsien Loong-i May 15 nü menden nungi alutsü aser pa indang deputy Lawrence Wong nem amoktsütsü ta Hombarnü ashi.

Arishi küm 72 tain Lee-i Singapore tir dang pa melen Wong ya ato kilonser shimtsü asoshi shisa agütsütsü, shiba tang deputy prime minister aser finance minister inyaker, ta pa indang office ajanga sangdong tatsüka nung ashi.

Mapang talangka nungi yimsü süa aruba People's Action Party nung ozüng yanglur ajungai Wong bhukumer aser pa kasa anogosa national palace nung tezüngzüktep agitsü ta ashi.

Lee ya 2004 küm August ita nungi ato kilonser aser PAP tekolak mapa inyaka arur.

Taoba küm November ita nung Lee-i mapa nungi anisüngzüksü sangdong aser pa melentsü asoshi Wong tenüng agüja liasü. Lee yagi pa arishi küm 70 majungdang anentsü sentong liasü, saka COVID-19 pandemic mechi iba sentong athitsüsa akum.

(Maneni tapak 8 nung...)

MOLUNGNEN O



15th April 1921 – 06th April 2024

Tsüngremer tesüngmangtsü taochi kuli **REV. SADEMMEREN AMRI**, Changki yim nungi, taküm lemag küm 103 Tsüngremi aniogo.

Teti tatem maka anisüngzüc daki pa ogo, saka pai toktsüba senmangtem, tamang, temeim aser Tsüngremer lu nung bendanga tenzüka teti mesamai alitsü.

Temeim tsürabur Rev. Sademmeren Amri mapang tatsüka shirangba aser tasüba ajuruba mapang shirnokisa sarasadem, temeim, nübo, shisatsü aser rongsen agi yariogo, nenok ajak dang kinungertemi pelaba lemsateper.

Nüngteta item teloktem dang kanga pelaba shisemer :

- | | |
|--------------------------------------|---|
| 1. Baptist Church Changki | 19. Jangpetkong Baptist Pastors & Associate Pastors women Telongjem |
| 2. ABAM, Impur | 20. Changki Laishiri Longjem |
| 3. Changki Yimlang Baptist Church | 21. Shri. TemjenmenbaPongen Hon'ble Advisor , Transport & Technical Education Govt. of Nagaland |
| 4. Longsa Baptist Church | 22. Women Department Baptist Church Changki |
| 5. Merayim Baptist Church | 23. Baptist Church Changki Choir |
| 6. Nokon Baptist Church | 24. Changki Sungdakba Putu Menden |
| 7. Satsukba Baptist Church | 25. Chungliyimsen Putu Menden |
| 8. Chungliyimsen Baptist Church | 26. Merayim Village Council |
| 9. Mokokchung Town Baptist Church | 27. Merayim Arogotsur |
| 10. Ao Baptist Arogo Shillong | 28. Amri Pacha Fellowship Changki |
| 11. Dibua Baptist Church | 29. Amri Kidongtsür |
| 12. Longtho Baptist Church | 30. Amri Pacha Mangkolemba |
| 13. Sapangya Compound Baptist Church | 31. Amri Pacha Mokokchung |
| 14. Alongkima Baptist Church | 32. Changki Fellowship Mokokchung |
| 15. Waromong Baptist Church | |
| 16. Waromong compound Baptist Church | |
| 17. Saruti Nagamese Baptist Church. | |
| 18. Ao Baptist Church Diphupar | |

Nenok ajak dangi tsüngdong arua pelaba meshitetba atema kanga sasaa bilemer, saka teyanglur Tsüngremi nenok mapa tajung moajangma ta ozü tamang sarasadem.

~ Kinungertem



Lt. AOLEPLA JAMIR

8TH AUGUST 1927 ~ 11TH APRIL 2024
~ MANGMETONG ~

Ozü temeim tsürabur Lt. Mrs. Aolepla Jamir onok nungi pilar onok mangyim jashi nung alidang, onok dang aria bilema inyakba temeim mapatem ajak asoshi onok kinungertemi kanga pelaba lemsateper.

Onok nungdak ajak nung sarasadem, nebo aser rongsen agi meima yarir kija-kibongtem, tembar-medemertem, arogo, lokti aser temeimertem ajak dang onok mulungjang ajak agi kanga pelaba metetdaktsür. Onoki nenok temeim mapatem asoshi pelaba peria meshitetba asoshi sasar.

Ano, asüpila sentep nung metentetaka, shirnokisa ariabilem o yoka onok den mangyim jashi lemsatepogo, nenok ajak dang nenok sarasadem aser mulungsüngzüc o asoshi pelaba lemsateper.

~ Temeim Chirurtem, Anük-apang & Semchirtem.

OFFICE OF THE MOKOKCHUNG DISTRICT VETERAN FOOTBALL ASSOCIATION MOKOKCHUNG : NAGALAND PELABALEMSATEPER

All Nagaland Veteran Football Tournament 11 buba asayamung Chümoukedima nung March 26 -29, 2024 nung asayadang Mokokchung Team champion asütsüsa takok tulu ngutetba asoshi asayar aser yaritepertem ajak dang Mokokchung District Veteran Football Association office nungi pelaba metetdaktsür.

Ano, iba asayamung nung takok ngua shilem agitetsüsa yariteper item nisungtem dang pelaba shisemer:

1. Metsubo Jamir, Hon'ble Minister
2. Tongpang Ozukum, Hon'ble MLA and Advisor
3. A. Pangjung Jamir, Hon'ble MLA and Advisor
4. T.N. Mannen, Hon'ble MLA and Advisor
5. Imkongmar, Hon'ble MLA and Advisor
6. Temjenmenba, Hon'ble MLA and Advisor
7. Bendangyanger (Director Rtd. Agri)
8. Temjensenla, DIG Range Mkg
9. Manoj Kumar A IPS, SP & President MDVFA
10. Jemti Mollier, Advisor MDVFA
11. Imchatoshi, Advisor MDVFA
12. Mayang Lima (UPA Lokayukta)
13. Limasunep, IGP
14. Changmonger, ADS Mkg
15. Supo Jamir, Dimapur
16. Tumchobemo (Addl. SP Mkg)
17. Chiten Yaden (Director Rtd. Employment)
18. Tali Pongen, President, Agri & Allied (NDPP Central)
19. R. Imkongtangit Jamir, Chuchuyimlang
20. YRO & Staff
21. Bendang Yaden, Addl. Director
22. K. Temjen Jamir, Editor Tir Yimyim
23. Imnameren, Executive Engineer
24. Mill Owners' Association, Tuli Area
25. Tiakumzuk (Chungtia)
26. H. Chuba Phom, Planning Officer Mkg
27. Manoj Kumar Acharya
28. Mr. & Mrs. L. Yanger Lemtur

Ano, Nagaland Veteran Football Association nung MDVFA nungi Wb. Yanger Lemtur, Vice President shimba asoshi Nagaland Veteran Football Association dang pelaba metetdaktsür.

Sd/-
Limatemsu
General Secretary, MDVFA.

Sd/-
Imsu Jamir
Vice President, MDVFA

Stefanos Tsitsipas-i Monte Carlo Masters kokogo



Rongchii/April 15, 2024

(Agencies): Deobarnü Monte Carlo Masters tebur kija asaya final nung Stefanos Tsitsipas-i 6-1, 6-4 agi Casper Ruud koka tang agi tasembububa iba asayamung kokogo.

Wornd No. 12 Greek nung asayar shiba ATP rankings nung top 10-i iogo, pai iba asayamung ya 2021 aser 2022 kuma koker lir.

Tsitsipas-i, final masaya tsüngda par team den sensaksem ka akaba ajanga pa ajungmesoa liasü, ta ashi.

"Ni parnok dang kecha tetsübu makai asayatsü ta ashi aser yamaji asayaogo," ta arishi küm 25 tain asayar yagi ashi, shibai semi-finals nung Australian Open koker alisang Jannik Sinner tsükdakja liasü.

Asaya nung Tsitsipas-i winner 30 angu aser Ruud-i 20 dang ngua liasü. Ruud-i iba asayamung semifinal nung Honibarnü number one asayar Novak Djokovic tsükdakja liasü.

Taküm iba asayamung akokba süleen Tsitsipas ya Monte Carlo titles asembe mesüra iba dang timba akokba asayar pongububa kumogo. Rafael Nadal (11), Bjorn Borg, Thomas Muster aser Ilie

Nastase nungeri iba asayamung asembe mesüra iba dang timba koker lir.

Asaya nung mezüngbuba set nung Tsitsipas-i game tasembububa nung Ruud indang serve ka break asü aser break point asem kümzüka pa 3-1 agi tejakdang aküm.

Iba sülen Tsitsipas-i Ruud nem asaya ka danga mekokdaksüi mezüngbuba set 6-1 agi koka liasü.

Tanabuba set nung asayar anapronglai game trok tashi serve break mesüdaksüi asaya atu. Iba sülen Tsitsipas-i Ruud indang serve ka break süa pai asaya koka liasü. Pai iba asaya minute 98 nung koka liasü.

Kasa mapang nung Ruus shibai French Open nung anaben tashi final tonga asayaogo, pai junga masayatetba atema sentepa aliba lokti dang tatok meshia liasü.

"Iba asayamung ano khen akokba atema Stefanos nem tenüngsang agütsür, pai hopta tepeyong kanga junga asayaogo," ta Ruud-i ashi.

"Ni tanü junga masayatetba atema taitokang. Ni tanaben iba asayamung nung tarutsü nung tajungba asayatetsü imla atar," ta paisa shisem.

Taoba mapang England nung asayar Derek Underwood süogo



Rongchii/April 15, 2024

(Agencies): Taoba mapang England aser Kent nungi nungtugu cricket asayar Derek Underwood arishi küm 78buba nung süogo.

Slow left-arm bowler Underwood-i 1966 nungi 1982 tsüngda Test asaya 86 nung wicket 297 agi, koba England nung spinner tem rongnung wicket timtiba agiba lir.

Pai first-class asaya nungi

asaya 676 nung wicket 2,465 agir liasü. Pa domestic cricket küm 24 asayaogo aser tetenzük nungi tatem tashi Kent nungi dang asaya liasü.

Underwood ya 1981 küm MBE ama shim aser 2009 küm Marylebone Cricket Club indang Tir aküm.

Paisa, one-day internationals asaya 26 nung wicket 32 agi aser pa England team nungi iba dang nungi timba ben asayar lila saka 1977 kübok World Series Cricket nung shilem agiba aser 1981-82 küm South Africa rebel tour nung shilem agiba ajanga maongka mongutet.

Pa dang 'Deadly' ta ja liasü aser pa 2009 küm mezüngbuba International Cricket Council Hall of Fame nung züngsem 55 züngoksemba nung densema liasü.

Kent Cricket mendenbuba

Mykolas Alekna-i discus throw nung world record yangluogo

Rongchii/April 15, 2024

(Agencies): Lithuania nung asayar Mykolas Alekna-i Oklahoma nung Deobarnü Ramona Throws Festival nung discus 74.35m onteta tebur discus throw asaya nung otsü tasen ka yangluogo.

Arishi küm 21 tain Mykolas ya Olympics nung gold medal ana tashi ngur aliba discus thrower Virgilijus Alekna'er jabaso lir aser pai 1986 küm yanglur aliba record ka ajateta liasü.

Asayaba mapang mopung sena aliba maongka agia Mykolas-i pa masodang küm 16 tejaakdang 1986 küm June 6 nü Germany nung asayar Jurgen Schult-i discus meter 74.08 onteta otsü tasen yanglur aliba ajateta liasü.

Mykolas-i discus aonba ya mezüngbo 74.41m dang asateta liasü saka World Athletics-i asadangshia liasü. WA-isa, Mykolas-i iba asayamung nung shilem agiba ya discus throw series puti otsü nung tajungtiba ya shiogo. Pai 72.21m, 70.32m, 72.89m, 70.51m, 74.35m (WR) aser 70.50m onteta liasü.

Kasa mapang nung anogo ka tejakdang kasa tesem nung tetsür asaya nung Cuba tsür Yaime Perez-i discus meter 73.09 onteta 1980 küm yanglur aliba record ajatetba sülen Mykolas-ia iba otsü tasen yanglua liasü.

Mykolas-i otsü tasen meyangu tsüngda tebu Virgilijus ya discus talangtiba aonba asayatem rongnung tanabuba jenjang nung liasü. Pai 2000 küm discus meter 73.88 oner liasü.

Mykolas-i World aser European U-20 title benogo aser iba sülen arishi küm 19 asüba mapang 2022 küm senior European title bena liasü. Kasa küm Eugene nung silver medal



anguba sülen pa ya alima nung discus throw nung medal anguba asayatem rongnung tanobusang aküm.

Maneni 2023 küm Mykolas ya discus thrower rongnung meter 70 tonga discus aonba asayatem rongnung tanobusang aküm. Pai California nung discus meter 71.00 ona liasü.

Discus throw asaya puti otsü

nung discus talangtiba aonertem:

74.35m - Mykolas Alekna (Lithuania) - April 14, 2024

74.08m - Jurgen Schult (Germany) - June 6, 1986

73.88m - Virgilijus Alekna (Lithuania) - August 3, 2000

73.38m - Gerd Kanter (Estonia) - September 4, 2006

71.86m - Yuriy Dumchev (Soviet Union) - May 29, 1983.

BENDANGLI OSANG : Tapak 7 nungi...

Iran Tir Raisi-i April 22 nü Pakistan...

Jaish al-Adl, mesüra "Army of Justice" ya 2012 küm tentetba Baloch Sunni telungpur telok ka lir aser parnok ya timba Pakistan nung inyaksangshir.

Iba tatalokba sülen Paksitan-i Iran nungi Parnok indang ambassador anin aser Iran ambassador shiba iba mapang par linüki or liasü, pa meyipa marudaktsütsü ta sangdonga liasü, ta Geo News-isa metetdaksü.

Ajisüaka mapang tatsüka dang lir link ana tsüngda tesendaktep yanglushi aser

linük anaprongla nungi ambassador tem pei tata tesemi meyipa ao.

Osang ajanga ashiba agi, Tir Raisi ya bilateral tesendaktep, security dak sendakba nung tesendaktep, gas pipeline ka yanglutsü aser kokra Free Trade atema tenanzüktepba yanglutsü nükjidong nung Pakistan-i aotsü.

Kasa mapang nung Iran-i Hombarnü, Iran nung sepaitemi apuba rong ka nung taolen makai aliba Pakistan nungertem chioktsü ta sangdongogo.

May ita Singapore Ato Kilonser Lee...

"Linük mashi atema lenir melenteptsü ya kanga tongtipang. Lawrence aser 4G (fourth-generation) team-i talisa pandemic mapang nüburtemi tamang katettsüsa meranga inyakogo," ta Lee-i Hombarnü Facebook post ka nung ashi. "Ni Singapore nung alir ajunga dang Lawrence aser par team nem tenok teyari ajak agütsütsü aser Singapore tarutsü tia tajungba yangertsü asoshi parnok den yariteptsü ajungshir."

Yimtenren inyakyim melenshiba nung menutsü kuli kecha mali aser taruba küm national elections magidang Wong nem milen amoktsüba ajanga arishi küm 51 tain yimten yimsüsüri nübur mulungjang koktetsü aser linük tejakleni anir aotsü, ta Lee-i ashi.

Singapore nung COVID-19 anema raraba mapang Wong ya nüburtemi meteta aküm. 1965 küm nüchiso anguba sülen pa ya iba city-state indang tir pezü buba akumtsü.

PAP yagi 2020 general elections nung parliamentary menden 93 aliba nungi menden 83 nung takok ngua liasü. Ajisüaka ibaji par party asoshi tamajungtiba election liasü.

Lee ya Lee Kuan Yew'er jabaso tambosang lir, shiba Singapore nung ato kilonser mezüngbuba inyak aser pai küm 31 yimsü asüidang makamait city-state ya alima nung takartiba linük ka kuma yangertet.

Ajisüaka Singapore nung sorkari kanga sashia azüokba, media nokdangba aser sorkar anemer dak ozüng tesashi amshiba atema aitsür.

BILEMDANGANG

"Ochi nungbo pei tangatetba nungi tasetshi."